



partii naleraq

UPA 2017/131-01

20-04-2017

**Meeqqat tapersorsorneqarnissaannut Inatsisartut inatsisaat nr. xx, xx xxx 2017-imeersoq.**

Ilaqutariinnermut, Naligiissitaanermut, Isumaginninnermut Inatsisinillu atuutsitsinnermut Naalakkersuisoq)

Meeqqat tapersorsorneqarnissaannut Inatsisartut inatsisaattut siunnersuut Partii Naleraq sinnerlugu imanna oqaaseqarfigissuarput:

Ilumoorluinnarpoq meeqqanut inuusuttunullu tunngassuteqartunut annertuumik pisariaqartumillu iliuseqartoqarnissaa pisariaqartinneqartoq tamanit ilisimaneqarpoq. Aamma tamanna pillugu MIO-p nalunaarusaarisartagaasigut takuneqarsinnaavoq, minnerunngitsumillu meeqqanut inuusuttunullu suliassaqarfimmi suliassat amerlassusaat pillugu nassuiaammi ukioq manna saqqummiunneqartumi.

Tassanimi nassuiaammi ilaatigut takuneqarsinnaapput nunatsinni meeqqat 24 procentimiit 40 procent-i angullugu isumaginninnikkut suliassaqarfiusut. Aamma tassani takuneqarsinnaavoq inunnik isumaginninnermi sulisut ataasiakkaarlutik suliassanik 73-niik 104-at tikillugit suliaqartut. Aggvaqatigiisillugu suliassanik sularinnittartut ataasiakkaat suliassanik 84-inik suliaqartarput.

Taamaammat taakkunuunaannartigulluunniit takuneqarsinnaavoq meeqqat pisariaqartitsisut inunnik isumaginninnikkut pisariaqartitsinerat qanoq annertutigisoq.

Aamma tamanit ilisimaneqareerpoq kommunini inunnik isumaginninnikkut sullissinnermi sulisussanik ilinniarsimasunik amingaateqartoqartoq, tassami assersuutigalugu Qaasuitsup kommuniani inunnunik isumaginninnerup iluani atorfiit 55-it inuttassaqartinneqanngillat.

Tassami aamma meeqqanut inuusuttunullu suliassaqarfimmi suliassat amerlassusaat pillugu nassuiaammi ilaatigut imannak allaqqasoqarpoq:

“Suliassanik suliarinnittartunit ataasitakkaanit suliassat amerlassusaat 35-it suliarineqarpata, meeqqat inuusuttullu akornanni suliassat 4.634-iusut suliassanik suliarinnittartunik 132-ink pisariaqartitsoqassaaq. Nalunaarsuiffik 1-imi takuneqarsinnaavoq, massakkorpiaq nuna tamakkerlugu meeqqanut inuusuttunullu suliassaqarfinni suliassanik suliarinnittartut 55-isut. Taamaattumik suliassanik suliarinnittartut 77-it pisariaqassapput suliassat 35-it suliassanik suliarinnittartumik ataatsimit appartinneqassappata. 77-inik suliassanik suliarinnittartunik atorfinitsitsinissap kingunerissavaa ukiumoortumik 27-30 mio. kr. aningaasartuutunik qaffaaneq”.

Taakkua saniatigut maannamut nalunngereerparput septemberimut 2014-imut kisitsisit § 37-ikkut Naalackersuisuniit paasissutississiisutiginartut naapertorlugit taamanikkumut meeqqat 62-it angerlarsimaffiup avataanut inissinneqarsimasut, taakkunungalugu aningaasartuutit ukiumut 235 mio kr-it missaani annertussuseqartut.

Kaammattuutigissuarput piumasalarugulu inunnik isumaginninnermi siunnersortit allaffissornerujussuaq qimallugu suliassavimminnik sulitinneqalissasut, soorlu assersuutigalugu nakorsat suliannut atatillugu immiussissuteeranganik peqarput allaffissornermik suliaqarnissaraluinut annikillisaataasunik.

Aamma eqqaamasariaqarluinnarparput nunatsinni naatsorsueqqissaartarfiup kisitsisaatai naapertorlugit nunatsinni ilaqutariit pissakinnerit ukiumut 250.000 kr-it tikiinnarlugit aningaasarsiallit 70 % sinneqarmata aammalu maannamut taakku ilarpassui ulluinnarni inuuniarnermut angummanniapilooertut inigisaminniit anisitaasimasut anisitaanissaminnullu tullinnguutut meerartallit amerlasoorujussuummata.

Ilami inuit ilaqutariillu katillugit 8000-it sinneqartut ukiumut 50.000 kr-it inorlugit akissarsiaqartut naatsorsueqqissaartarfiup nalunaarutigini kuuvaa, allaammi ukioq december-imi aamma naatsorsueqqissaartarfiup oqaatigaa, ilaqutariit pissakinnerit suli amerleriarsimasut pissakinnerulersimasullu.

Taamaammat ilaqutariit meerartallit aningaasaqarnikkullu angummassinnaangitsut inigisaanniit anisiinnarnagit ingerlariaqqinnissaannut aqutissiuunneqarlutillu siunnersorneqartariaqarput.

Partii Naleqqamiit isumaqarpugut inuiaqatigiinni killiffippat aammalu inuiaat aqunneqarnerput nalilersoqqinneqartariaqartoq.

Taamaattumik takuneqarsinnaavoq nassuerutigigalugulu suliassaqarfik kommunit kisimiillutik naammassisinnaangikkaat. Aamma meeqqaat illersuisuata inatsisissatut siunnersuutip uuma qanoq ililluni piviusunngortinneqarsinnaanerani ernumanera Partii Naleqqamiit paasilluarsinnaavarput.

Inatsisissatut siunnersuummi angajoqqaat meeqqaminnut pisussaaffeqarnerat akisussaassuseqarnerallu ersarinnerusumik naqissuserneqartariaqartoq isumaqarpungut. Ullumikkut ajornanngippallaarujussuaqaaq meerarpassuit angerlarsimaffiup avataanut inissiinnarneqartarnerat. Eqqaamaneqartariaqarpoq meeraq pisuussuteqanngitsoq, pillakkatullusooq ilillugu angerlarsimaffimmiik aamma avatangiisinit sungiusimasaminiit qimangutsinneqartarmat. Tamatuma qularnanngilluinnartumik kingunerisarpaa; meeqqap inuunermini innarlerujussuarneqarnera, inuunermi sinnerani puujunngisaannangassaa.

Taamaammat isumaqarpugut meeqqat angerlarsimaffiup avataanut inissinneqartarnerat sapinngisamik pinngitsoortinneqartariaqartoq, tassami meeqqap ataatsip angerlarsimaffiup avataanut inissinneqarneranut pisortat qaammammut 80.000 kr-iniik 150.000 kr-it pallillugit aningaasartuuteqarfisarpaat, illua-tungaaticullu angajoqqaarsiat akeqanngingajattumik paarsitinneqartarlutik.

Isumaqarpungut pissutsit taamaannerat illua-tungaanut saatinneqartariaqartut. Angajoqqaanut angerlarsimaffimmi ajornartorsiutilinnut “Inuunerup ilinniarfianik” inatsisilerinermik ilinniarsimasunik, inunnik isumaginninnermut tunngasunut siunnersortinik il.il. sulisoqartumik, siunnersuineramik, pikkorissartitsinernik il.il. ingerlatsisinnaasunik pilersitsisariaqarpugut.

Aamma Ilaqutariit ajornartorsiuteqartut tamakkiisumik katsorsarneqarnissaat pisariaqarpoq.

Angajoqqaarsiat pikkorissartinneqartuarlutik tamakkiinerusumik akissarsiaqartinneqarlutik atorluarneqartariaqarput.

Aamma aatakkut/aanakkut ernuttaminnik paasilluarsinnaasut, utoqqalinersiutinut ilanngartuutaanngitsumik meeqqanik tiguisinnaanerat periarfissinneqartariaqartoq isumaqarpungut.

Siuliani oqaatigereerparput, meeqqanik angerlarsimaffiup avataanut inissiisarneq sapinngisamik pinaveersaartinneqartariaqartoq. Soorunami tassani angajoqqaat meeqqaminnut asanninnerat,

meeqqallu angajoqqaaminut asanninnerat asuliinnaanngitsoq nukittorsarneqarnissaa pingaaruteqartorujussuaq isumaqarpungut.

Meeqqat angerlarsimaffiup avataanut inissinneqartartut aningaasarsiutinngorsimanagerat akueriinnarneqarsinnaanngilaq aamma perorsaanikkut kalaallisut oqaatsivut kultur-erpullu atorlugit ingerlanneqalernissaat piunasaqaataasariaqarpoq.

Taamaammat aamma meerarpassuit maannakkut angerlarsimaffiup avataanut inissinneqarsimasut nakkutigineqarnerat naliliiffigineqartarnerallu pitsanngorsarneqartariaqarpoq, soorlumi aamma inatsisissatut siunnersuummi nakkutilliisoqarnissaanut tunngasut ilanngunneqarsimasut.

Isumaqarpugulli meeqqat angerlarsimaffiup avataanut inissinneqarsimasut nakkutigineqarnerat kommunip nammineerluni kisimi isumagissanngikkaa.

Isumaqarpugut Meeqqat illersuisuata ataani nakkutilliineq ingerlanneqartariaqartoq.

Taama oqaaseqarluta siunnersuutip aappassaanneeraneqannginnerani ilaqutariinnermut isumagininnermullu ataatsimiititaliami suliarineqarnissaa inassutingaarput.